

**„აფხაზეთის აბიტურიენტებისთვის მოსკოვის უმაღლეს სასწავლებელში 5 ადგილი გამოიყოფა“**

დე-ფაქტო აფხაზეთის ე.წ. საგარეო საქმეთა სამინისტრო 6 თებერვლიდან 3 მარტამდე საშუალოს სკოლების კურსდამთავრებულებისთვის საბუთების მიღებას აწარმოებს. კონკურსის საფუძველზე აბიტურიენტები მოსკოვის სახელმწიფო საერთაშორისო ურთიერთობების ინსტიტუტში (МГИМО) ჩაირიცხებიან.

რუსეთის ფედერაციის შესაბამისი განკარგულების თანახმად, აღნიშნულ უმაღლეს სასწავლებელში, დე-ფაქტო აფხაზეთის მოქალაქეებისთვის, ყოველწლიურად, ხუთი ადგილი გამოიყოფა.

პირველ ეტაპზე აბიტურიენტებმა უნდა დაწერონ განცხადება, რომელშიც სასურველ ფაკულტეტს მიუთითებენ, წარადგინონ დე-ფაქტო აფხაზეთის რესპუბლიკის შიდა და საზღვარგარეთის პასპორტების ასლები და ცნობა სკოლიდან აკადემიური მოსწრების შესახებ. მისაღები ტესტები 2017 წლის აპრილში ჩატარდება.

03.02.2017МИД РА<https://www.facebook.com/MidAbhazii/>

**„წებელდის სამხედრო პოლიგონზე არქეოლოგიური გათხრები დაიწყება“**

წებელდის სამხედრო პოლიგონზე, მე-19 საუკუნის ტაძრის და პოლონური სასაფლაოს ნგრევის ადგილზე, არქეოლოგიური გათხრების ჩატარება იგეგმება. ამის შესახებ დე-ფაქტო აფხაზეთის ე.წ. კულტურის მინისტრის მოადგილემ ბატალ კობახიამ განაცხადა. მისი თქმით 2 თებერვალს დე-ფაქტო აფხაზეთის ე.წ. თავდაცვის სამინისტროს წარმომადგენლებთან შეხვედრა გაიმართა, რომელზეც სამხედრო პოლიგონების რაიონში განლაგებული ისტორიულ-კულტურული მემკვიდრეობის შენარჩუნებაზე ისაუბრეს.

ბატალ კობახიას განცხადებაში ვკითხულობთ:

"საუბარი, პირველ რიგში, წებელდასთან დაკავშირებულ ინცინდენტს შეეხო, იცით, რომ მანამდე ივარაუდებოდა ძველი ეკლესიის და პოლონური სასაფლაოს დანგრევა... ჩვენ მივედით დასკვნამდე, რომ საჭიროა ამ ადგილზე მოკვლევის ჩატარება, რათა არქეოლოგებმა შეძლონ დაზიანების დონის განსაზღვრა“.

03.02.2017sputnik-abkhazia<http://sputnik-abkhazia.ru/Abkhazia/20170203/1020356810/kobaxiya-na-poligone-vebelde-budut-provedeny-arxeologicheskie-raskopki.html>

**„აფხაზეთის საგარეო საქმეთა სამინისტროს გაცხადება“**

დე-ფაქტო აფხაზეთის ე.წ. საგარეო საქმეთა სამინისტრო, საქართველოს საგარეო საქმეთა მინისტრის მიხეილ ჯანელიძის მიერ გაკეთებულ განცხადებას გამოეხმაურა.

დე-ფაქტო აფხაზეთის ე.წ. საგარეო საქმეთა სამინისტროს განცხადება საგარეო უწყების პრეს-მდივანმა ლაურა ტანიამ გააჟღერა. განცხადებაში ვკითხულობთ:

„როგორც ჯანელიძემ გუშინ, ევროპარლამენტის მიერ საქართველოსთვის ვიზაილბერალიზაციის მხარდაჭერის შემდეგ განაცხადა, უვიზო რეჟიმი ასევე ოკუპირებულ ტერიტორიებზე მცხოვრებთათვის იმოქმედებს.

აფხაზეთის საგარეო უწყება აცხადებს, რომ ევროპარლამენტის მიერ მიღებული გადაწყვეტილება მხოლოდ საქართველოს მოქალაქეებზე გავრცელდება და არავითარ შემთხვევაში არ ეხება აფხაზეთის მოქალაქეებს.

აღნიშნულ განცხადებას ვაფასებთ, როგორც საქართველოს ხელისუფლების მორიგ მცდელობად, რომ აფხაზეთის მოქალაქეები საქართველოს პოლიტიკურ-სამართლებრივ სივრცეში ჩართოს. ცხადია, რომ მას შემდეგ რაც ნეიტრალური პასპორტების იდეა მთლიანად ჩავარდა, საქართველოს ხელისუფლებამ გადაწყვიტა კიდევ ერთი სატყუარა გამოიყენოს, ევროკავშირის ქვეყნებთან სავიზო რეჟიმის ლიბერალიზაციის სახით. ცხადია, რომ თბილისის ეს მცდელობა, ისევე როგორც ყველა დანარჩენი მცდელობები, მარცხისთვის არის განწირული.

ზემოაღწერილიდან გამომდინარე ვაცხადებთ, რომ საქართველოს ხელისუფლების მცდელობა, რომ აფხაზეთის მოქალაქეები პირადი პოლიტიკური მანიპულაციებისთვის გამოიყენოს, უპერსპექტივოა. თუ ქართველი ხელმძღვანელები მართლაც არიან შეშფოთებული აფხაზეთის მოქალაქეების გადაადგილების თავისუფლების საკითხით, მაშინ უარი თქვან ჩვენი მოქალაქეების საერთაშორისო იზოლაციაზე, რომლებსაც თბილისის გამო, ევროკავშირის ქვეყნებში შესვლა ეკრძალებათ.“

03.02.2017МИД РА <https://www.facebook.com/MidAbhazii/>

### **„სოხუმში წელიწადნახევარში მაღალტექნოლოგიური სამედიცინო ცენტრი ამოქმედდება“**

სოხუმში მაღალტექნოლოგიური სამედიცინო ცენტრი აშენდება. ამის შესახებ დე-ფაქტო აფხაზეთის ე.წ. ჯანდაცვის მინისტრმა ანდზორ გოგომა და აღნიშნული პროექტის ხელმძღვანელმა ევგენი ოლეინიკოვმა განაცხადეს.

სამუშაო შეხვედრაზე, რომელიც აფხაზეთში მცხოვრები რუსეთის მოქალაქეებისთვის სამედიცინო დაზღვევის პროგრამის ამოქმედებასთან დაკავშირებით გაიმართა, სამომავლო გეგმებზე იასუბრეს.

ევგენი ოლეინიკოვმა აღნიშნულ გადაწყვეტილებას სტრატეგიული უწოდა და განაცხადა, რომ ცენტრში სამედიცინო დახმარების მიღებას მოსახლეობა დე-ფაქტო აფხაზეთიდან გაუსვლელად შეძლებს. მისივე ცნობით, ცენტრში, რომლის მშენებლობა, სავარაუდოდ, წელიწადნახევარში უნდა დასრულდეს, პირველ ეტაპზე 4 განყოფილება იფუნქციონირებს: კარდიოქირურგია, ჰემოდიალიზის განყოფილება, ლაბორატორიული და რეპროდუქციული ტექნოლოგიები.

07.02.2017минздрав ра <http://minzdravra.org/index.php/ru/2014-12-11-19-29-29/sobytiya>

### **„აფხაზეთის საპარლამენტო არჩევნებში ალექსანდრე ანქვაბის მონაწილეობას ვეტერანები აპროტესტებენ“**

დე-ფაქტო აფხაზეთის ე.წ. ექსპრეზიდენტის ალექსანდრე ანქვაბის მონაწილეობას ე.წ. საპარლამენტო არჩევნებში დე-ფაქტო აფხაზეთის ვეტერანები ეხმაურებიან. ესენია, საზოგადოებრივი ორგანიზაცია „აფხაზი ხალხის 1992-1993 წ. სამამულო ომის მონაწილე ინვალიდ ქალთა ასოციაცია“, საზოგადოებრივი ორგანიზაცია „1992-1993 წ. აფხაზი ხალხის სამამულო ომის ვეტერანები „აბაში“, რესპუბლიკური საზოგადოებრივი ორგანიზაცია „1992-1993 წ. აფხაზი ხალხის სამამულო ომის ვეტერანები „არუა“

ზემოთ ჩამოთვლილი ე.წ.საზოგადოებრივი ორგანიზაციების განცხადებებში ვკითხულობთ;

„ყველას გვახსოვს აფხაზეთის უახლესი ისტორიის ერთერთი ყველაზე რთული, 2014 წლის 27 მაისის, დღე. მაშინ განვითარებულ მოვლენებში დამნაშავე ალექსანდრე ანქვაბია. მას

შეეძლო შეეჩერებინა საქართველოს მოქალაქეებისთვის უკანონოდ პასპორტების გაცემის პროცესი და დაესაჯა დამნაშავეები, მაგრამ მან ეს არ, ან ვერ გააკეთა და კინალამ კატასტროფამდე მიიყვანა ქვეყანა. ახლა კი მას არ აქვს უფლება იგნორირება გაუწიოს ათასობით აფხაზეთის მოქალაქეს და კენჭი იყაროს დეპუტატად.

შეგახსენებთ, რომ დე-ფაქტო აფხაზეთში ე.წ. საპარლამენტო არჩევნები 12 მარტს უნდა გაიმართოს.

დე-ფაქტო აფხაზეთში 35 ოლქია და ე.წ. დეპუტატები მაჟორიტარული პრინციპით აირჩვიან. ბოლო მონაცემებით, 135 საინიციატივო ჯგუფი და 4 პოლიტიკური პარტია ცდილობს 35 ე.წ. საპარლამენტო მანდატის გაყოფას.

პარტიებს შორისაა მოქმედი ე.წ. პრეზიდენტის რაულ ხაჯიმბას გაერთიანება "აფხაზეთის ეროვნული ერთიანობის ფორუმი", "სახალხო ფრონტი", "აინარი" და "ამცახარა". "ამცახარა" ყველაზე აქტიური და დიდი ოპოზიციური გაერთიანებაა, რომლის ლიდერია ასლან ბჟანია და ეს გაერთიანება ექსპრეზიდენტ ალექსანდრე ანქვაბის მხარდამჭერადაც მიიჩნევა, თუმცა ამ ე.წ. არჩევნებზე ანქვაბის კანდიდატურა არა ამ პოლიტიკურმა ძალამ, არამედ საინიციატივო ჯგუფმა წამოაყენა.

დე-ფაქტო აფხაზეთის ე.წ. ცსკო-ს განცხადებით, ე.წ. საპარლამენტო არჩევნებისთვის, დე-ფაქტო აფხაზეთის ბიუჯეტიდან 15 000 000 რუბლია გამოყოფილი. ე.წ. ცსკო-ს თავმჯდომარის თამაზ გოგიას თქმით ხარჯთაღრიცხვის გაზრდა გამოიწვეულია იმით, რომ საარჩევნო უბნების 70 პროცენტზე მოსალოდნელია მეორე ტური.

---

09.02.2017 Республика Абхазия <http://gazeta-ra.info/index-1.php>

10.02.2017